

XANA WA SWI PFUMELA LESWI?

 Kutani loko hi nga se khongela, ndzi nga tsakela ku vula leswi, leswaku madyambu lawa ya nga hundza, ndzi pfumela leswaku a kuri wona, ndzi byerile manana un'wana leswaku, "Loko ntsena wo endla tani hilaha hi nga lerisa ku endla hakona, leswaku swi nga...n'wana wa nhloko ya mati, yi ta phya." Kutani nhloko ya n'wana yi phyile, vusiku bya tolo, hafu ya inchi hi mpimo wa ntambhu. Swingaleswi manana luya u n'wi tisile lahwani sweswi.

² Sweswi, xivangelo xova ndzi endlile sweswo, sesi, swi hi xikongomelo. Wa vona? Loko mo vona nchumu lowu wu khomedekaka wu ri karhi wu humelela, sweswo swi ta endla leswaku ripfumelo ra n'wina ri kula kuya emahlweni mi swi pfumela. Minkarhi yin'wana ndzi endla sweswo ntsena ku, kumbexana, tani hi ku kombela munhu kuva a tlakuka, a teka goza kumbe mambirhi, ku fambisa voko ra wena, ku dzinginyissa rintiho ra wena, ntsena nchumu lowu va nga ta wu endla ku hambana, ntsena ku va pfumelela ku vona leswaku swi lulamile. Ntsena va kumeka va chava na ku ehlleketa leswaku a swi nge humeleli, kambe swi le ku humeleti nkarhi hinkwawo. Wa vona? Swi fanele kuva tano.

³ Xana i vangani lava va lavaka ku tsundzukiwa eka xikhongelo, sweswi? Xana mi nga yimisa mavoko ya n'wina kutani mi ku, "Hosi, hi nyike swona"? A hi korhamiseni tinhloko ta hina.

⁴ Hosi, tani hilaha hi twaka risimu ra kahle leri ra khale ra kereke, leri nga tsariwa hi munghana wa mina wo hlawuleka, Paul Rader, "Pfumela Ntsena," hi le ku ehlleketeni sweswo hi mufana, loyi a tisiwile hi tatana wa yena eka vadyondzisiwa, a ku nga se hundza khume ra masiku endzhaku ka loko Kreste a va nyikile matimba yo hlongola madimona na ku horisa vavabyi, kutani lahwani va ta hluriwa hi ku hetiseka hi xiymo xa switshetshela. Kutani va vonile Hosi ya hina yi ri karhi yi ta. Hi loko tata wa n'wana a tsutsuma kutani a ku, "Hosi, hi tweli vusiwana. N'wana wa mina u hlaseriwa swinene hi dimona. Ndzi n'wi tisile eka vadyondzisiwa va Wena nakona a va swi kotanga ku n'wi hanyisa."

⁵ Yesu a ku, "Ndzi nga swi endla, loko u pfumela. Pfumela ntsena." O Xikwembu, a Wu cincanga na swintsongo hi mpfhuka ka sweswo: Wa hari yaluya wo rhandza, wo olova, na Xikwembu xa nsovo. Tani hilaha a Wu ri xiswona khale, Wa hari tano na namunthla. Kutani Hosi, ku kotisa tata wa n'wana, hinkwerhu ha huwelela, "Hosi, U hi susa ku kala ripfumelo ka hina." Swi olovile ngopfu; ntsena hi khuguriwa hi swona, Tatana.

⁶ Hi lava ku Ku nyikela ku khensa na ku dzunisa kuva u khumbhile xihlangi lexiya vusiku bya tolo, ku vona leswaku xipalapala lexiya, lexi a xi kukumukile, leswi swi nga, leswaku rhambu leri a ri susumetele ehandle, ri phyile hi hafu ya inchi vusiku bya tolo. Hi khensa ngopfu eka sweswo, Tatana. Loko hi swi tiva leswaku madokodela ya hina ya hava nchumu eka vulavisisi eka swona, ku hava nchumu lexi va nga ta xi endla hi swona; kambe Wena wa hari Xikwembu, N'winyi wa swiyimo hinkwaswo. Ha Ku khensa, Tatana. Ha Ku khensa hikwalaho ka ku tshembheka ka manana loyi, ku olova, na ku yingisa hi ku vuyisela ntambhu endzhaku na ku yi namarheta ehenhla ka xiphemu lexi xa phepha, lahawani, ku kombisa vanhu vumbhoni bya yena hikwalaho ka ku kwetsima ka Xikwembu. Ingaku xiciwani xa yena xi nga hanya na kuva n'wana wa kahle, hikwalaho ka ku kwetsima ka Wena.

⁷ Langutisa mavoko lawa ya yimeke, Tatana. Rin'wana na rin'wana ra wona ri na xilaveko. Ra mina ri yimile, na ronavu, Tatana, ndzi na xilaveko. Nakona hi lava vo tala lahawani, hi xivumbeko xa papila kumbe endzeni ka bokisi leri, lava va nga na swilaveko, vanhu lava va nga na swilaveko hi xiviri. Swi pfumeleli swi humelela, Hosi, leswaku un'wana na un'wana a kuma xikombelo xa yena vusiku lebyi. Ingaku va nga teka vumbhoni bya manana loyi kutani byi va ntsena tani hi xikombiso ku kombisa leswaku loko U vula swin'wana na swin'wana, swi herile. Swi... Wena... Hinkwaswo leswi hi nga fanela ku swi endla i ku swi amukela na ku tirhana na swona. I ntirho lowu wu nga helela.

⁸ Hi nyike, Hosi, leswaku rin'wana na rin'wana ra mapapila lawa na swidukwana leswi, vanhu lava swi tlhandlekiwaka ehenhla ka vona, ingaku va nga horisiwa. Hinkwavo lava va nga yimisa mavoko ya vona, Tatana, va nga amukela ku navela ka timbilu ta vona. Ha swi kombela, hi Vito ra Yesu. Amen. Mi nga tshama ehansi.

⁹ Ntsena a ndzi lava ku mi kombeta ntambhu lahawani, leyi manana luya (Hi sweswo. Ahaa...) leswaku nhloko ya n'wana yi phyile tani hilaha Hosi yi nga hi tshembhisa hakona hi Moya lowo Kwetsima vusiku bya tolo. Xana a yi sasekanga? Swingaleswi, swi hi nyika matimba swonghasi kuva na ripfumelo na ku pfumela.

¹⁰ Sweswi, loko Yesu a byerile nsinya luwa, eka Marka 11:23, "A ku nga havi na munhu loyi a nga ta dya muhandzu wa wena ku sukela sweswi," A ngava a nga huwelelanga. Hikokwalaho ka yini tani hi, entiyisweni, A olovile swonghasi mayelana na swona, ku kondza vadyondzisiwa va Yena ntsena... Ndzi ehleketa leswaku un'wana wa vona u N'wi twile. Nakona swi... Loko switshetshelwa leswiya, loko swi tava swi tile emahlwени ka Hosi Yesu, mufana u vile na ku hlaseriwa ko tika ku tlurisa loku a nga se tshamaka a va na kona; kumbexana, a wela ehansi

tani hi loko a file, kambe u swi lemukile leswaku a hlanganile na Un'wana Loyi a ri na ripfumelo leri nga ehenhla ka vaapostola swinene.

¹¹ Sweswi, ndzi nga tsakela leswaku un'wana loyi a nga pfumeriki eka ku horisa ka Matimba a langutisa leswi. Yesu a va nyikile matimba yo hlongola mimoya, nakona va tsandzekile. Ku ngari leswaku matimba ya tsandzekile, kambe vona va tsandzekile. Yesu u va byerile:

“Hikokwalaho ka yini hi nga swi kotanga ku ri hlongola?”

Yena a ku, “Hikokwalaho ka ku tsana ka ripfumelo ra n'wina.”

¹² Kereke ya hari na wona matimba. Xikwembu a xi kalanga xi teka matimba ya Xona eka kereke, kambe kereke a yi na ripfumelo ro ringanelu ku ya tirhisa eka swona. Hi sweswo ntsena. Swi olovise xisweswo. Hi ringeta ku swi hlangananisa minkarhi yin'wana, kambe loko mi nyanya ku endla leswaku Evhangheli yi olova, hi laha mi nyanyaka kuva na swa xiviri, loko ntsena mi olova eka yona: Xikwembu xi vurile tano; sweswo swa swi tshamisekisa; nakona hi sweswo ntsena. Nakona ntsena mi swi pfumela, yanani emahlweni.

¹³ Loko Yesu a ku, “A ku nga havi na munhu loyi a nga ta dya muhandzu wa wena,” hikokwalaho ka yini, matluka a ma xongile na ku vangama hilaha ma nga tshama ma va xiswona. Mahanti a ma languteka ku fana, kambe le hansi ka misava etimintswini letiya, vutomi a byi sungula ku nyamalala.

¹⁴ Swingaleswi swi tano ehenhla ka mfukuzani, ehenhla ka muxaka wun'wana na wun'wana wa vuvabyi lebyi—lebyi mi nga lavaka ku byi ehleketa. Loko u nga amukela Rito ra Xikwembu, le hansi-hansi ka timintsu, mfukuzani yi nga hava yi ri kona; voko ra wena ri nga hava ri omile ku kotisa sweswo. Sweswo swi hava xo xi endla hi ku horisa ka Matimba. I, “Loko ntsena u nga pfumela.” Wa vona? Kun'wanyana le hansi, i khale ma yile eku tirheni.

¹⁵ Yesu u te, “Loko mi nga ku ka ntshava ley, ‘Rhurha,’ nakona mi nga kanakan etimbilwini ta n'wina, kambe mi pfumela leswaku leswi mi nga swi vula swi ta humelela, mi nga kuma leswi mi nga swi vula.” Xana a swi rhandzeki sweswo? Xana swi nga huma eka mani sweswo? N'wana wa Xikwembu, Loyi Marito ya yena... Matilo na misava swi ta hundza, kambe sweswi... kambe Marito ya Yena ya ngaka ya nga hundzi.

¹⁶ Sweswi, ndlela yin'we ntsena ley mi nga endlaka sweswo, mi fanele kuva na xikongomelo lexi lulameke na nsusumeto lowu lulameke. Sweswi, loko a ndzi yile ehandle lahwani kutani ndzi ku, “Ndzi ta mi komba leswaku ndzi nga rhurhisa ntshava ley, ‘Rhurha, ntshava.’” Yi ngaka yi nga rhurhi. Na swintsongo. Swi ngari na mhaka leswaku ndzi na yini. Ku fanele kuva... Xo sungula mi fanele ku kuma ku rhandza ka Xikwembu.

¹⁷ Xexo hi xona xivangelo, hi ntolovel elayinini ya xikhongelo, ndzi—ndzi kuma leswo nonoha, swi hikokwalaho kova swi ri nchumu wun'wana lowu nga humeleta etilayinini na swin'wana, kutani kwalaho hi kona mi tlhelaka mi swi kuma nakambe. Kambe ma swi vona, loko mi ri na vudyoho lebyi byi nga vuriwangiki... Xana mi kale mi swi lemuka eka mhangu, loko ndzi nga se byela moyo lowo biha kuva wu huma? Ndzi langutisa mhangu yaleyo swinene ku tiyisisa leswaku ku hava nchumu eka vutomi byebyo lowu nga sivelaka swin'wana na swin'wana, wa vona, hikuva tsundzukani, eka tinyiko leti, mi nga nghena ekhombyeni hi tona.

¹⁸ Xikwembu, ma swi tsundzuka nkarhi wun'wana, xi nyikile muprefeta... xi endlile muprefeta hi munhu, Muxé, na ku n'wi byela ku rhelela, a ya vulavula na ribye. Kutani muprefeta a nyanyukile ngopfu, kutani a huma, a ya ba ribye, ku vulavula hi ku tsana ka Kreste, leswaku A fanele ku fa ra vumbirhi kumbe ku biwa ra vumbirhi. A ri na matimba ya ku ma humesa, kambe a ku ngari ku rhandza ka Xikwembu.

¹⁹ A ndzi nga ta kala ndzi swi pfumela leswaku a kuri ku rhandza ka Xikwembu kuva Eliya a famba-famba hinkwako, hikuva vana a va n'wi hlekula hi mayelana na kuva a ri na mpandlha, a ndzi ehleketi leswaku a fanele kuva a swi endlile sweswo. Kambe a ri muprefeta, nakona a hlundzukisiwile, kutani u vekile ndzhukano ehenhla ka vana lavaya kutani tiberhe timbirhi ta xisati ti dlaya makume mune-mbirhi wa vana lava nga riki na nandzu. Wa vona? Kambe a ndzi pfumeli leswaku a fanele kuva a endlile sweswo. Nakona ntsena—ntsena swi... hi...

²⁰ Xikwembu, ndzi pfumela leswaku namuntlha, loko Xi nga se veka kereke ya Xona eku fumeni, Xi ringa kereke ya Xona ku vona leswi yi nga ta swi endla.

²¹ Hina... nkarhi lowu taka, kumbexani, loko Hosi yi swi rhandza loko ndzi vuya, hi tava na nkarhi wo tshama eka swin'wana swo kotisa sweswo, eka swin'wana leswi lunghekelaka ku humeleta, kutani hi ta tiva swo tala mayelana na swona hi nkarhi walowo.

²² Kambe ntsena loko u nga vula rito, u ku, "Hosi, ndza swi pfumela," u nga kanakani, u swi vula embilwini ya wena...

²³ Sweswi, a hi nge hi xikombiso, a ndzi ri enkoveni, nakona a ndzi... Ndzi chumayilela mamiliyon ya vanhu, kambe ntsena ku tsemakanya ntshava lahaya, kuna ntlawa wa vanhu va dzana, nakona va le kufeni handle ko tiva Kreste. Kunene, ndzi na miliyon lahwani vo va chumayilela, kambe hambi swi ri tano, Nchumu wun'wana embilwini ya mina wu le ku ndzi byeleni, "Tsemakanya u ya eka vanhu lavaya. Yana eka vona. Va le ku loveni." Mina n'winyi a ndzi lavi kuya, kambe hambi swi ri tano kuna Nchumu wun'wana endzeni ka mina. Wa vona,

xexo i Xikwembu, xi fambaka. Xana ma swi vona leswaku xikongomelo i yini, xana ma swi vona leswaku nsusumeto wa ku famba i yini, ku ngari hi ndzexe... Sweswi, loko ndzi ku, "Kunene..." Loko kuri ku xikongomelo xa mina xo ya kwalahaya xi lulamile, kambe ndzi fika lahawani kutani hi leyi ntshava leyikulu, ndzi ku, "Wa swi tiva, loko ndzo hundza eka ntshava liya kutani ndzi ponisa vanhu lavaya va dzana hinkwavo, siku rin'wana va tava na xifaniso xa ribye lahaya: Makwerhu Branham, mumixinari lonkulu." Sweswi, nsusumeto wa mina a wu lulamanga. Ntshava yi ngaka yi nga wi. Ee, nkulukumba.

²⁴ Kambe loko nsusumeto na xikongomelo xa mina swi lulamile, kutani Xikwembu embilwini ya mina xi ri karhi xi ndzi fambisa, nakona ndzi nga koti ku hundza hi le henbla ka ntshava, ku rhendzeleka hi ntshava, ehansi ka ntshava, ndzi nga ku, "Ntshava, rhurha." Kumbexani yi... Loko ndzi vula sweswo, nakona ku ngari ku tlula hilaha ndzi swi vulaka hi muxaka luwa wa moya wo lulama, ndzi fambisiwa hi Moya lowo Kwetsima, hi ku rhandza ka Xikwembu, ku ngaka ku ngavi na nchumu handle ka xilepulana xin'we xa ntshava yaleyo xi nga ta wela ehansi, kambe yi le ndleleni ya yona. Siku leri landzelaka ku nga hava na ku wa ka tipondzo timbirhi. Hi siku leri landzelaka kuva kotara ya thani. Nakona kumbexani hi n'hweti, ku wa ntlhanu wa tithani. Mi ri yini hi yona? Mi ngava mi nga se yi vona, kambe yi le ku fambeni, endleni ya yona. Ndzi ta tshama kwalahaya kutani ndzi hlalela nchumu walowo wu endleka, hikuva Xikwembu xi vule tano nakona sweswo swa swi tshamisekisa.

²⁵ Xana u nga swi ehleketa sweswo hi mayelana na manana wa wena lahaya vusiku lebyi? Swi lulamile, loko wo swi ehleketa, u ta hola. Swi lulamile. Sweswo hi loko kuri ku u ta swi pfumela: ntsena vula rito ivi u tshama na rona. Wa vona? Ntsena swi pfumeli; u khomelela eka swona. Hi swona Vutomi lebyi nga heriki.

²⁶ Sweswi, mundzuku ni ndzhengha... Ndzi byerile Billy, vusiku lebyi, ntsena ku susa makhadi ya xikhongelo, nakona a ndzi lava ku vulavula. Ndzi tiyisisa hi ntiyiso, a ndzi ri karhi ndzi famba-famba ku sukela hi Sunguti, entsungeni wa malwandle, na ku vuyela endzhaku, ePhoenix, kwala kaya, na ku tlhelela, na hinkwako hi ku hetiseka (Ku vonisisa lokuya) Ku kondza ndzi tsana ku fikela laha ndzi nga ha swi tiviki leswaku ndzi yimile kwihi nkarhi wun'wana. Ntsena swi lo kumeka swi ndzi xupula.

²⁷ Kutani, ndzi fanele ku famba, nakona va... n'wina—n'wina vamakwerhu mi ndzi rhambile ku ta tshama masiku nyana. Hilaha ndzi khensaka sweswo hakona. Hakunene ndzi ehleketa leswaku lowu i ntlawa wa tiministara ta kahle lahawani. Ndzi navela loko ingi a hi ri na nkarhi nyana wa xinakulobye. Loko Hosi yi swi rhandza, ndzi ta vuya nkarhi wun'wana. A kuna nchumu wun'wana, ntsena ku suka ekerekeni yin'wana kuya

eka yin'wana na ku rhendzeleka hi doroba na ku mi endzela hinkwenu. Ndzi nga tsakela ku swi endla sweswo: xin'wana na xin'wana lexi ndzi nga xi endlaka ku pfuna Mfumo wa Xikwembu, hi leswaku, loko mi nga lava kuri ndzi swi endla. Kutani mi tlhela mi vuya nkarhi wun'wana mi ta hlangana na hina na kuva na ya kahle, nhlengeletano ya kahle kun'wana.

²⁸ Kutani tsundzukani, vamakwerhu, ndzi tava ndzi ri karhi ndzi mi khongeleta. Walowo i nchumu wun'we wa ntayiso. Nakona ndzi lava leswaku hinkwenu mi ndzi khongeleta, hinkwenu ka n'wina.

²⁹ Kutani sweswi ndzi—ndzi... Mundzuku ni mixo i swikhongelo swa kereke eka tikereke ta kahle hinkwato leti to hambana-hambana kwala dorobeni.

³⁰ Sweswi, yin'wana ya mintlawa yo suka eJeffersonville yi kona kwala. Van'wana va vanghana va mina, un'wana wa mathirasti ya mina ekerekeni, u kona, Makwerhu Fred Sothmann. A ndzi kalanga ndzi kota ku n'wi vona enhlengeletanweni. Na boti... Oho, vo tala vanghana va mina lavan'wana ku suka le henhla eJeffersonville, wa mina mupri... matsalani wa mina lahaya na—na hinkwavo va kona, kun'wana kwala nhlengeletanweni. A ndzi se va vona.

³¹ Kutani vamakwerhu, kuna tikereke tin'wana ta kahle kwala edorobeni. Kutani hinkwenu ka n'wina vaendzi, kumani yin'we ya tona kutani mi ya eka tikereke leti mundzuku. Ti ta mi endla swa kahle, ndza tshembha. I vamakwerhu lava va pfumelaka eka ministri wa muxaka lowu. Hi xona xivangelo xova va tshamile kwala eka platifomo na le hansi etindhawini leti lahawani, hikuva va pfumela eka wona. Nakona ndza va khensa vavanuna lava.

³² Hosi, katekisa chaptara leyi ya Full Gospel Businessmen lahawani lava—lava va nga seketela nhlengeletano leyi. Kuna... Ndzi pfumela leswaku sweswo a swi lulamile, lava nga seketela nhlengeletano. Ndzi—ndzi ya eka vaseketeri vo tala va vona, hikuva kwalahaya... A hi fanelanga kuva hi ndlela leyi, kambe minkarhi yo tala, vamakwerhu a hi pfumeleleni ku hambana swintsongo: ku kotisa loko munhu a pfumela nchumu nyana wun'wana wu ntsongo, un'wana, *swin'wana* swi ntsongo; Swi endla tani hi ku khwekela nyana na timbunga ta khale ku suka le ndzhaku, a ti fanele kuva ti horile hi nkarhi lowu, kambe ti—ti... Kutani loko mi, kumbe, loko ndzi kuma Full Gospel Businessmen, kutani sweswo swi endla tani hi ku pfuneta ku ti bohelela, kutani hi hlengelatana kun'we, na kuva na xinakulobye xa xiviri kun'we, ntsena minkarhi ya kahle. Nakona ha swi khensa sweswo. Xikwembu a xi katekise ku avanyisa kwaloko. Ndzi pfumela leswaku Xikwembu xi ku pfuxile hikokwalaho ka xikongomelo.

³³ Sweswi... kutani ndzi vile na nkateko lowukulu wa ku vona ndhawu ya Makwerhu Oral Robert siku rin'wana. Na swona mina, ndhawu yo kurisa leswiya, nchumu wo sasekisa leswiya. I-i xitsundzuxo eka Pentekosta.

³⁴ Kutani ndzi yile eka Makwerhu Tommy Osborn, yin'wana ndhawu ya kahle, wanuna wa kahle wa Xikwembu, loyi... Makwerhu Tommy na mina hi le kusuhi ngopfu, Makwerhu Oral, na yenavu, ntsena vaboti lava nga kusuhi swinene, nakona ha rhandzana, na ku ringeta hilaha hi kotaka hakona ku tirha hinkwaswo leswi hi nga swi kotaka eka vunene bya vanhu eka Mfumo wa Xikwembu.

³⁵ Swingaleswi kunene ndzi khensa vavanuna lavaya va nga kona kwala dorobeni leri exikarhi ka vavanuna lava hinkwavo mi nga na vona. N'wina tinyimpfu mi na varisi va kahle. Ntsena ndzi, ndzi ta swi vurisa xisweswo. Ingaku Hosi yi ngaya emahlweni na kuva na n'wina hinkwenu i xikhongelo xa mina. Kutani sweswi mundzuku ni ndzhengha, ndzi... Xana xikhongelo xi sungula nkarhi muni, vamakwerhu? Hafu ku bile awara ya mbirhi. A hi nge hi awara ya n'we—n'we kumbe hafu ku bile awara ya n'we mi fanele kuva kona leswaku swi nga kavanyetani na swikhongelo leswin'wana hinkwaswo.

³⁶ Sweswi, loko kuri ku vafana a va se mi byela, vusiku lebyi va na tibuku, swifaniso na swin'wana, na tithepi, na tirhekbedo, ta...ta nhlengeletano, kutani va swi xavisa. Kambe hi ngaka hi nga va pfumeleli kuva va swi xavisa hi Savata, mundzuku. A kuna tibuku hambi xin'wana na xin'wana lexi nga ta xavisiwa mundzuku. Swingaleswi hi ngaka...a hi se tshama hi swi pfumelela sweswo. Hambi leswi vo tala va nge te, "U hoxisa swinene..."

³⁷ Kutani Papa Bosworth wa khale a tshamela ku ndzi byela leswaku, "Oho, Makwerhu Branham, a wu hoxisa lahaya," kambe yaleyo i ndlela leyi ndzi titwisaka xiswona (Wa vona?), nakona ndza—ndza titwa. Loko mi lava yin'we, va mi nyika yin'we, kambe loko mi... Kambe hi ngaka hi nga xavisi hi—hi Savata. Ee. Hi sweswo. Loko ndzi pfumela sweswo, ndzi fanele ku swi hanya, ntsena... Ndzi fanele ku hanya na mina. Ma swi vona? Nakona ndzi—ndzi fanele ku hanya na ku pfumela ka mina swingaleswi... Kumbe mi nga rhumela ekaya, kutani, ehenhla le ndlwini, ehenhla le ndhawini kutani mi yi kuma.

³⁸ Sweswi vusiku lebyi, oho, hinkwerhu ntsena a hi rivaleni sweswo, oho, leswaku kuna ntirho wun'wana na wun'wana lowu faneleke ku endliya, kumbe swin'wana na swin'wana, kumbe ku tikarhata ka siku. Ntsena a hi vekeni hinkwaswo etlhelo, ivi hi langutisa eRitweni eka timinetse tintsongo, kutani hi vona leswi Xikwembu xi nga ta hi byela swona hi Rito ra Xona. Kutani ndza khongela leswaku Xikwembu xi nga hi nyika nkateko lowukulu swinene vusiku lebyi.

³⁹ Gene, xana mi nga ndzi tlhakisela xona? Xana mi nga ndzi tlhakisela xinhwenyetana xexo? Xana a hi xona nchumu nyana wo xonga? Xana u nga tsakela kuya ekaya na mina u ya tlanga na Sarah wa mina lontsongo, wo leha ku fika *laha*? Oho, u nga swi endla? Ndzi—ndzi nga tsakela kuva u swi endla. U lava ku ringana na wena, nakona hi yena xinhwenyetana xa Papa. Ahaa. Ham. Nakona ndza tshembha leswaku u—u rhandza Papa wa wena na wenavu, a hi swona? Mhani? Oho, kunene wa n’wi rhandza. Xinhwenyetana xo xonga swinene, ndzi tshamile lahawani, ndzi n’wi langutile. Matihlo lamantsongo ya languteka tani hi swimbhovani swimbirhi leswi nga tshwa enkumbeni na—na misisi leyintsong ya buraweni.

⁴⁰ Ndza swi rhandza swihlangi. Ndzi na swinhwenyetana swi mbirhi ekaya. Xin’we xa swona i Rebekah nakona lexin’wana i Sarah.

⁴¹ Kwala nkarhi nyana lowu nga hundza, a ndzi ri ekule. Havumbirhi i swinhwenyetana swa Papa, ma swi tiva, nakona ndza swi rhandza. Nakona ntsena loko swa ha ku nghena ndzi fanele ku swi bebula, nakona... i Becky ntsena lexi xi kulaka ku swi fikelela; xi kurile ku kotisa leswi ndzi nga xiswona. A xi ta tshova nhlana wa mina sweswi; xi... kambe xi tama xa ha ri xinhwenyetana xa Papa, hambi swi ri tano. Kutani sweswi, hi kwalomu ka lembe rin’wana, hi lava ku xi yisa exikolweni xa Bibele kun’wana nakona ekule na xikolo xa mani na mani.

⁴² Kutani, a swi yimerile Papa, ma swi tiva, kuva a vuya ekaya. A ndzi humile ndzi yile enhlengeletanweni. Kutani hi xa mundzuku na vusiku a swi tava swi ndzi yimerile ku kondza kuva xikarhi ka vusiku kuva ndzi ringeta ku nghena. Swingaleswi, ndzi hatlisile ndzi nghena ka hari nimixo swinene, kwalomuya ka awara ya nharhu kumbe ya mune. Kutani manana a ta erivantini a ta ndzi pfulela, nakona a ndzi karhele ngopfu na ku hlakala, ndzi... Kwala eka platifomo, ndzi... loko e... u totiwile swi twala kahle, kambe loko sweswo swi kala swi suka eka wena, kwalano hi laha u nghenaka ekhombyeni. Xana i vangani lava a va swi tiva sweswo? Hikokwalaho ka yini, kunene swi tano.

⁴³ Langutisani. Eliya u yile ehenhla ka ntshava kutani a vitana ndzilo ku suka etilweni, a vitana mpfula ku suka etilweni, kutani loko Moya wu sukile eka yena, u kayakayile emananga ku ringana makume mune wa masiku kutani Xikwembu xi n’wi kuma, xi n’wi kokela kun’wana endzeni ka bakwa.

⁴⁴ Yonasi, u rhelerile kutani a ya tshama endzeni ka khwiri ra nkava va nga heti ku ringana masiku manharhu na vusiku byinharhu, u hlantiwile eribuweni kutani a rhendzeleka a ri karhi a chumayela. Doroba hinkwaro ri hundzukile na kuya eka Xikwembu. Kutani loko ntoto wu sukile eka yena, u yile ehenhla

ka xiganga kutani a kombela Xikwembu kuva xi teka vutomi bya yena. Wa vona?

⁴⁵ Ndzi yimile etlhelo ka sirha ra William Cowper, ku ngari khale ngopfu, loyi a nga tsala risimu leriya ra ndhuma leri hi ri tirhisaka eka ntirho wa hina wa xilalelo:

Kuna xihlovo lexi nga Tatiwa hi Ngati,
Leyi nga kokiwa emisiheni ya Emanuel,
Laha vadyohi va nga nyupela ehansi ka
ndhambhi...

⁴⁶ Xana mi kale mi swi twa leswi a...leswi swi nga n'wi humelela? Endzhaku ka loko nhlohlotelu wu n'wi sukerile eka sweswo, u ringetile ku kuma nambu laha a ta tidlaya kona.

⁴⁷ Ndzi tshama kwalahaya ku tsemakanya Muti wa Kentucky wa Khale. Nakona Stephen Foster u nyikile Amerika tinsimu ta rona to tala ta xintu. Kutani loko a tsala, a kuma nhlohlotelu wa le henhla, nhlohlotelu walowo, a tsala risimu, kutani loko a humile eka wona, a famba a ya pyopyiwa. Eku heteleleni, u vitanile nandza kutani a teka xisinghwani a tidlaya.

⁴⁸ Vanhu a va swi tivi leswi vanhu lava vahanyaka eximoyeni va hlanganaka na swona. Sweswi *lahawani*, mi twa ingaku mi nga susa ntshava, kambe pfumelelani ntoto wu wa ku suka eka n'wina, kutani mi suka mi kongoma rivanti leriya (Loko ku ngari na munhu wo mi khoma lahaya, Wa vona) kutani, kumbexani eka tiawara ti ngari tingani ma tikeriwa, mi tivutisa leswaku mi le kwihi. Kutani vusiku hi ku landzelelana, sweswo swi nyanya ku mi tikisela.

⁴⁹ Kutani swintsongo...Ndzi lava ku mi byela hi Sara lontsongo na Rebekah. Swingaleswi hi mixo lowu landzelaka, a ndzi nga koti ku etlela, kutani ndzi pfukile, ndzi tshama exitulwini, nakona endzhaku ka nkahi Becky, a ri lonkulu, a ri— a ri na milenge yo leha ku tlula Sarah, swingaleswi Becky u tile a ri karhi a tsutsuma...u pfukile, a tlula a suka emubedweni, a nga pfuxi makwenu wa yena, kutani hi loko a ta ku suka endlwini, a tsutsuma hi matimba hilaha a kota hakona. A ri karhi a ku, “Papa, Papa...” Ndzi tlharhamula wun’wana wa milenge ya mina, kutani a tlulela kwalahaya, a tiseketela kahle. Ku kotisa e—e kereke ya ximanguva-lawa, ma swi tiva, yi vile entlangwini nkahi wo leha, ma swi tiva, ku ringana madzana ma ngari mangani ya malembe. A kota ku tiseketela kahle, ivi a ndzi vukarha hi mavoko ma yena a ku, “Oho, Papa wa mina, Papa wa mina...”

⁵⁰ Kutani Sarah lontsongo, hi huwa, u pfukile. Kunene, a ndzi tivi loko n'wina vana mi swi endla, kumbe ee; va mina va swi endla: Lontsongo u kuma leswo gabuleriwa. Swingaleswi Sarah a ambarile tipijama ta Becky, milenge yi lehise xisweswo, ma swi tiva. Kutani hi loko a ta, nakulorhi wo koma nyana, a ri karhi a wa, a khuguriwa. Kutani u fikile kwalahaya, a hlwerile.

Swingaleswi Becky u hundzulukile, a ku, "Sarah, sesi wa mina, ndzi lava ku ku byela swin'wana." A ku, "Hi mina wo sungula ku fika. Nakona ndzi na vulawuri bya vukorhokerhi. Swingaleswi ndzi phanghile Papa a helerile nakona a kuna nchumu lexi nga ku salela."

⁵¹ Yaleylo i ndlela leyi vanhu van'wana va ringetaka ku ehleketa vukhongeni hi yona, a hi swona? Ahaa. Hi swona sweswo.

⁵² Kutani mbuyangwani Sarah lontsongo, a ahlamisa xinon'wana xa yena, kutani switihlwana swa yena swa ntima swi ndzi langutisa, ivi a sungula ku rila. Kutani Becky a vekile rhama ra yena eka ra mina, a ndzi vukarhile. Ndza n'wi rhandza. Kutani Sarah u sukile a famba hikuva Becky a phanghile Papa a helerile. Ndzi voyamiserile tsolo lerin'wana ku kotisa *leswi* kutani ndzi n'wi kowetela ku kotisa *sweswo*. Oho, u tsakile hi xihatla ivi a tsutsuma, a tlulela ehenhla ka tsolo ra mina leswaku... A nga seva emisaveni nkarhi wo leha nakona milenge ya yena a yi nga fikeli na le hansi. A endla ingaku wa dedeleka nyana (kumbexani, ku kotisa leswi ndzi nga xiswona, ntsena ku dedeleka nyana, ma swi tiva), nakona a ngari... a nga koti ku fikela ehansi. A ngari dinominexini leyikulu, ma swi tiva, nakona a nga koti ku fikela ehansi. A nga seva emisaveni nkarhi wo leha.

⁵³ Swingaleswi, a endla ingaku wa dedeleka, kutani ndzi hoxile mavoko havumbirhi ehenhla ka yena ku kotisa *leswi* ivi ndzi n'wi vukarhela ekusuhi na mina, kutani a vangamisa switihlwana leswiya swa ntima, kutani a langutisa Rebekah. A ku, "Rebekah, sesi wa mina," a—a ku, "ku ngava kuri ntiyiso leswaku u phanghile Papa a helerile, kambe ndzi lava u tiva nchumu wun'we: Papa u phanghile mina ndzi helerile." Swingaleswi...

⁵⁴ Sweswo i... Ntsena kuva A ndzi phangha ndzi helela. Ndzi ngava ndzi ngari na dyondzo yo tlhandleka swilo leswikulu, kambe ntsena loko ndzi tiva leswaku U ndzi phanghile ndzi helela, eku dedelekeni ka mina, ntsena ku N'wi pfumelela a tlhandleka mavoko havumbirhi emirini wa mina, swi ta ndzi endla ndzi titwa kahle.

⁵⁵ Kunene, a hi nyikeleni rito nyana rin'wana ra xikhongelo eka Yena loko hi nga se pfula Rito.

⁵⁶ Sweswi, Tatana wa le Tilweni, hi lemuka leswaku hi kotisa vana na hinavu. Nakona—nakona U rhandza kuva na hina, na ku gandzela na hina. Kutani tani hi leswi hi gandzelaka Wena, nakona Wena wa hi rhandza, na ku hi khoma hi mavoko ya Wena, na ku rhumela Moya wa Wena lowo Kwetsima, na ku hi tivisa leswaku Wa hanya na swona U Tatana wa hina, ha Ku khensa swonghasi. Sweswi, pfumelela Moya lowo Kwetsima wu ta eka hina vusiku lebyi. Rhandza mbilu yin'wana na yin'wana, Hosi. Hi nyike nkateko wuntshwa. Chululela mathonsi ya mberha ya tintswalo ehenhla ka hina, Tatana. U nga langutisi swidyo swa

hina. Swi tele ngopfu. Hosi, ntsena swi rivaleli. Swi suli, Tatana, kutani u hi tekela emavokweni ya Wena, na—na ku horisa vuvabyi bya hina, na—na ku basisa mimoya ya hina, kutani u ntshuxa mimoya ya hina, Hosi, leswaku hi ta gandzela na ku dzunisa Wena, hi va tani hi vana lavantsongo lava tsutsumaka ku rhendzeleka na yindlu, ntsena hi ri karhi hi swi tiva leswaku Papa u hi langutisile. Hi nyike swona, Hosi.

⁵⁷ Sweswi, ku hava munhu loyi a kotaka ku—ku hlamusela Rito. Ha swi lemuka sweswo. Yohana u vonile Buku evokweni ra xinene ra Loyi a tshameke ehenhla ka xiluvelo, nakona a ku ngari na munhu etilwени, kumbe emisaveni, kumbe ehansi ka misava loyi a lulamerile ku teka Buku kuva a yi pfula, kumbe ku lemula swilemo. Kutani hi loko ku ta Xinyimpfana, lexi a xi dlayiwile ku nga seva na masungulo ya misava. Nakona a Xi lulamerile. Kutani Xi tekile Buku, ivi xi lemula swilemo, kutani xi pfula Buku. O Xinyimpfana, tana vusiku lebyi. Hi pfuleli Buku, Tatana, tani hi leswi hi rindzelaka Wena, hikuva hi swi kombela hi Vito ra Yesu, Xinyimpfana xa Xikwembu. Amen.

⁵⁸ Ndzi hlawurile, vusiku lebyi, ndzimana nyana ya Matsalwa lahawani ya marito manharhu. Kambe xo sungula ndzi lava ku hlaya ndzimana kumbe timbirhi ku suka eka Mukwetsimi Yohana, ku avanyisa ka vu11 ku sungula hi ndzimana ya vu23.

Yesu a ku ka yena, Makwenu u ta tlhela a pfuka.

Marta a ku ka yena, ndza swi tiva... u ta tlhela a pfuka eku pfukeni ka vafi hi siku ra makumu.

Yesu a ku ka yena, hi mina ku pfuka ni... vutomi: loyi a pfumelaka eka mina, hambi loko a file, u ta tlhela a hanya:

Kutani un'wana na un'wana loyi a hanyaka a va a pfumela eka mina a ngaka a nga fi. Xana wa swi pfumela leswi?

A ku ka yena, Ina, Hosi: ndza pfumela leswaku hi wena Kreste, Nwana wa Xikwembu, loyi a faneleke ku ta emisaveni.

⁵⁹ Kutani ku kuma tsalwa ndzi navela ku tirhisa marito lawa manharhu: *Xana Wa Swi Pfumela Leswi?*

⁶⁰ Ndzi hlayile xitori nkarhi lowu nga hundza. Ndzi ehleketa leswaku a kuri xitori xo makeleriwa. Nakona hakanyingi tiministara hinkwato, ndza tshembha, ti hlayile buku ya Dr. Ingraham ya—ya *Hosana Ya Yindlu Ya Davhida*. I buku ya kahle. Yi, ndzi ehleketa leswaku, a ya ha humelerisiwi. Ndzi nga tsakela ku yi kuma yi tsariwile, leswaku ndzi ta yi veka exikarhi ka vanhu.

⁶¹ Kutani kwalahaya, a ndzi ri karhi ndzi hlaya atikili yintsongo hi Lazaro loyi, na hi Yesu, na Mariya, na Marta, valava, vamakwavo va Lazaro. Kutani a ndzi ri karhi ndzi hlaya

kwalahaya leswaku laha Yesu a tshama kona, ndza pfumela, na Marta na Mariya. Ha vumbirhi a va ri vanhwanyana vo rhandzeka va Vaheveru. Kutani Lazaro a ri karhi a dyondzela kumbe ku tokotela kuva mutsari etempeleni, ku endla mapapila ya nawu eka vaprista.

⁶² Kutani Yesu a ri na xinakulobye xa kahle, ngopfu-ngopfu na Lazaro. Loko hi hlaya ebukwini laha A nga ta ekaya ka vona, nakona Marta a hlwela nyana mayelana na kuva a yingisa marito ya Yena, kambe a fanele ku lulamisa swakudya na ku deka tafula, kambe Mariya u tshamile emilengeni ya Yena. Kutani Yesu u virile leswaku Mariya u hlawurile swilo swo antswa.

⁶³ Kutani, hi byeriwile leswaku Lazaro a ri yena loyi a nga yisa Yesu eka Yohana, eka xitori xa tibuku ta Dr. Ingraham, nakona . . . eka *Hosana Ya Yindlu Ya Davhida*. Hambi swi ri tano, sweswo swi ngava swi ngari ntiyiso, a ndzi swi tivi, kambe ntsena eka vuyimelo bya swona, kambe A fanele kuva a ri karhi a hanya na vona.

⁶⁴ Sweswi, a hi ri eku dyondzeni eka leri taka, vhiki leri nga hundza, swa antswa, leswaku Yesu u virile eka Mukwetsimi Yohana 5:19, “Mina . . . N’wana a ngaka a nga endli nchumu hi Yexe, kambe leswi A vonaka Tatana a swi endla: N’wana na yena u swi endlisa sweswo. Leswi swi endlaka hi Tatana N’wana na yena wa swi endla.” Wa vona? “Leswi A vonaka Tatana a swi endla.”

⁶⁵ Swingaleswi ku endla leswaku lexi xiva xitori lexi lulameke, Tatana, Xikwembu, xi tava xi vulavurile na N’wana wa Xona, Yesu, kutani xi ku, “Munghana wa Wena, Lazaro, u ya ekufeni, kambe ku tava kuri swa kahle, swingaleswi Wena u suka emutini. U ya ekule, hikuva a ku ta komberiwa Wena kuva u n’wi khongelela, kumbe, ku n’wi horisa, nakona—nakona a Ndzi swi lavi kuva U endla sweswo.” Loko mi langutisa xitori loko hi ri karhi hi ya emahlweni, mi ta xi vona xi tlhandlakanya eka ntiyiso waluwa wa sweswo. Swingaleswi, Yesu, ntsena ehandle ka ku tsundzuxa kumbe swin’wana, u sukile a ya ekule na muti kutani a ya kun’wana, a nga vuyanga vusiku byebyo. Nakona u yile emadorobeni man’wana. Kutani loko Yesu a ha ku suka emutini, kutani khombo ri nghena.

⁶⁶ Kutani loko Yesu a suka emutini wa wena, khombo ri le ndleleni. Ntsena tsundzuka, loko A sukela muti wa wena, khombo ri le ndleleni. Loko mi nghanisa tisosayiti ta tiko na hinkwaswo swi ta tirha ekerekeni ya n’wina hi ku hetiseka, tani hi silinda yin’wana leyikulu ya kahle ya Rickenbacker, ivi mi siya Yesu ehandle ka yona, loko Yesu a suka ekerekeni ya n’wina, khombo ri le ndleleni. Ina, nkulukumba, loko Yesu a sukela dinominexini, leswaku va N’wi veka etlhelo kutani va ku, “Kunene, sweswi ho ka hi nga pfumeli leswaku swilo leswi swi

ngava swi lulamile,” ivi mi tekelela nchumu wun’wana, khombo ri le ndleleni ya rona. Ntsena tsundzukani sweswo.

⁶⁷ Swi ndzi tsundzuxa xitori xa Hosi Yesu, lexi kumekaka eka Buku ya Luka. Ma swi tiva loko A hari mufana wa khume mbirhi wa malembe hi vukhale, Vanhu va ka rikwavo va N’wi tekile, tani hi leswi ntolovel a wuri wa lembe rin’wana na rin’wana, ku fika eka nkhuvu wa Pentekosta. Kute loko va hari edorobeni ra Yerusalem enkhubyeni na ku tiphina, hi kuma eBibeleni, leswaku ku vile masiku manharhu va ngari na Yena. Na leswaku a va ehleketa leswaku kumbexani, ntsena va lo swi ba hi makatla, leswaku Yesu u tava a ri exikarhi ka van’wana va maxaka ya vona. Sweswi, hi ngaka hi nga swi endli sweswo. Hi loko va ta ku hundza eka maxaka ya vona ku kuma leswaku, A nga ri kona.

⁶⁸ Kutani hi ngaka hi nga swi bisi hi makatla, ntsena hikokwalaho kova hi ri Mamethodist, Mabaptist, Mapresbyterian, Mapentekosta, na kuva vuyimelo bya hina na vakokwani va hina va vile vapfumeri lavakulu, ntsena ho swi teka, kunene, hi swi bisa hi makatla, Yesu u na hina. Hi ngaka hi nga swi endli sweswo. Hi fanele ku tihlanganisa na Yena masiku hinkwawo na timinetse hinkwato. Oho, ndza swi rhandza sweswo.

⁶⁹ Ndzi lava leswi Xikwembu xi nga swona sweswi. Leswi vatswari va mina a vari na swona, leswi vakokwani va mina a vari na swona, swi kahle, kambe (leswi a vari na swona swi kahle.) Ndzi ehleketa leswaku hi le kule ku tlhandluka hi patu.

⁷⁰ A hi voneni leswi A nga swona namuntlha. A ndzi lavi ku langutisa endzhaku kutani ndzi vona leswi Tatana Moody a nga swi endla, hikuva hi le kule ku tlhandluka hi patu ku tlula Tatana Moody. Xiphiko hi kereke ya hina: i kuva hi langutisa endzhaku kutani hi ku, “Kunene, a hi voneni leswi Tatana John Wesley a nga swi vula, leswi lavan’wana va nga swi vula.” Xexo hi xona xivangelo xova sayense yi ri ekule swonghasi erivaleni ra yona, ku tlula leswi vukhongeri byi nga xiswona eka ra byona.

⁷¹ Lahawani madzana nharhu wa malembe lawa ya nga hundza, mutivi wa sayense wa Mufurwa u khorwisile leswaku loko u nga famba hi rivilo lerikulu ra makume nharhu-ntlhau wa timayili hi awara, giravhitheini yi nga ku susa emisaveni. Xana u ehleketa leswaku sayense yi nga ha tlhelela endzhaku eka sweswo namuntlha? Va famba khume nkaye wa madzana ya timayili nakona va ha ya emahlweni. Va susumetela emahlweni, va langutile emahlweni. Kambe hina hi lava ku langutisa endzhaku ku ta vona leswi Moody a nga swi vula; leswi Sankey a nga swi vula; leswi Finney a nga swi vula; Knox, Calvin; van’wana va lavaya. Leswi va nga swi vula a swi ri kahle. Sweswo a kuri swa nguva ya vona, kambe hina hi ya emahlweni.

⁷² Kokwani wa mina wa xinuna a khandziya xikocikara xa tihavi. Mina ndzi chayela Ford V8. N'wana wa mina u ta haha hi xihahampfhuka xa jet. Hi leswaku, hi ya emahlweni. Sweswo hi leswi vukhongeri a byi fanele kuva xiswona. Ku vuya ka Hosi ku le kusuhi. Kereke a yi fanele kuva yi ri karhi yi ya emahlweni ematimbeni ya yona. Sayense yi nga khandziya ntsena ku fika kwalano kutani yi fanele ku wa, kambe hi na swihlovo leswi nga kiwangiki, leswi nga se tshamaka swi khumbhiwa, swa matimba, lawa ya nga riki na swipimelo, ya Xikwembu, lawa a hi fanele kuva hi ya eka wona. Hi hanya eka miliyoni ra timayili ehansi ka nkateko wa hina namuntlha, ta minkateko ya Vakreste kuva va tiphina hi yona. Ndzi khomiwa hi tingana loko ndzi langutisa ehandle lahwani kutani ndzi vona tindzawulo, na vuavabyi, na makhombo lawa ya yaka emahlweni sweswi. Kereke ya hina a yi fanele kuva yi ri karhi yi famba hi switarata, ku horisa vavabyi, ku pfuxa vafi, ku hlongola madimona, ku endla masingita na swihlamariso, ku endla leswaku misava hinkwayo yi lemuka leswaku Yesu Kreste wa hanya. Sweswo hi leswi a hi fanele hi ri karhi hi swi endla.

⁷³ Hikokwalaho ka yini, mi ri, "Tatana Moody a nga kalanga a . . ." Tatana Moody a nga hanyanga hi nkarhi lowu. Hi swona sweswo. Hi hanya eku Vuyeni ka Hosi. Nakona hi swi bisile hi makatla leswaku A ri na maxaka ya hina. Kambe siku rin'wana loko mutlhontlhi a tlhontlhile Tatana Graham, hi kumile leswaku A ngari exikarhi ka maxaka ya hina.

⁷⁴ Xana va N'wi kuma kwihi? Xana va n'wi kumile kwihi—kwihi Yesu? Kwala va nga N'wi siya kona. Xana va N'wi siyile kwihi? Enkhubyeni wa Pentekosta. Xana hi n'wi siya kwihi Yesu, xana hi kwihi laha kereke? Enkhubyeni wa Pentekosta. Loko hi ya ekule na matimba lawaya ya khale ya Pentekosta na nkhuvu wa Pentekosta, hi ya ekule na Yesu. Hi swona sweswo, munghana. Hi hanya ehansi ka minkateko ya hina. Ina, nkulukumba.

⁷⁵ Va N'wi siyile enkhubyeni wa Pentekosta, nakona yaleyi i ndhawu yin'we ntsena leyi Mamethodist, Mabaptist, Mapresbyterian, na Mapentekostal va nga N'wi kumaka kona, i ku tlhelela laha mi nga N'wi siya kona. Xana wu le kwihi ntsako wa Hosi? Xana ma kwihi matimba ya Hosi? Kereke ya vutisa namuntlha, "Xana—xana ku humelerile yini hi Xikwembu xa matimu?" Xi yimerile kuva vanhu va Xona va Xi vitana eka mbono. Kambe e . . .

⁷⁶ Hi ngaka hi nga swi endli hi tidinominexini. Hi ngaka hi nga swi endli ehansi ka ntivo miehleketo. Hi ngaka hi nga swi endli hi dyondzo. Ha tihambanyisa, hi tiava. A hi avananga. Hi munhu un'we hakunene eka Kreste Yesu. Hinkwerhu hi un'we eka Kreste, nakona tidinominexini ta hina ti ngaka ti nga swi koti. Na vukahle bya tona, ti ngaka ti nga swi koti. Dyondzo

ya hina i xirhalanganyi xikulukumba lexi Evhangeli yi nga tshama yi va na xona, i dyondzo.

⁷⁷ Leswi hi swi lavaka a hi dyondzo. Hi lava matimba na ku kombisiwa ka Moya lowo Kwetsima ekerekeni ku kombisa matimba. Yesu a nga kalanga a ku, "Fambani emisaveni hinkwayo kutani—kutani mi dyondzisa." A nga kalanga a ku, "Fambani emisaveni hinkwayo kutani mi endla . . ." U te, "Fambani emisaveni hinkwayo kutani mi chumayela Evhangeli." Nakona Evhangeli i ku kombisa matimba ya Moya lowo Kwetsima, ku pfuxiwa. Ha ha kayivela hi miliyoni ya timayili ku tlula laha a hi fanele kuva hi ri kona. A hi yeni emahlwени. A hi tlheleleni endzhaku laha hi nga N'wi siya kona enkhubyeni wa Pentekosta.

⁷⁸ Yesu u vurile, eka Yohana, ndza pfumela, ku avanyisa ka vu15, A ku, "Hi mina Nsinya wa vhinya; n'wina mi marhavi." Kunene sweswi, loko Nsinya walowo wa vhinya wu veka rhavi ro sungula, kutani ku suka eka rhavi rero ku tsariwa Buku ya Mintirho, rhavi ra vumbirhi ri ta endla Buku yin'wana ya Mintirho. Rhavi ra vunharhu ri ta endla Buku yin'wana ya Mintirho. Kutani rhavi rin'wana na rin'wana leri ri humaka eka Nsinya walowo wa vhinya ri tava ri fana na leswi rhavi lero sungula a ri ri xiswona.

⁷⁹ Sweswi, mi nga tema, ha swi tiva sweswo. Ndzi vonile nsinya wa xilamula wu ri na kwalomu ka tinxaka ta nhungu ta mihandzu yo hambana eka wona. Ndzi vonile nsinya wa mulamula wuri karhi wu veka mabambalakuza, na swikwawava, na leswin'wana hinkwaswo eka wona, kambe a swi lo temiwa.

⁸⁰ Sweswo hi leswi swi nga xiphiqo namuntlha. Hi temiwile eka mianakanyo ya hina, hi temiwile eka tidinominexini ta hina, kambe loko nsinya walowo wo tshuka wu vekele nsinya wun'wana wa mihandzu, hi woxe, wu ta fana na leyi ya xiviri leyi nga nghena eka wona. Haleluya! Oho, kereke yi ta hlangana kun'we, kambe hi lava matimba ya xiviri. Hi lava Moya lowo Kwetsima, matimba ya ku pfuxiwa ka Yesu Kreste. Sweswo hi leswi A nga hi byela ku swi endla.

⁸¹ "Hi mina Nsinya wa vhinya, n'wina mi marhavi." Loko bambalakuza ri humesa xihluke, kutani xi humela ehandle na tidiriva to saseka ta wasi, nsinya wa vhinya lowu xi nga ta wu veka wu tava na tidiriva to saseka ta wasi eka wona. Loko Nsinya wa vhinya wo sungula wu humile, kutani va werile ehansi ka switandzhaku swa Moya lowo Kwetsima, kutani va endlile mahlori lamakulu, na masingita, na ku lemela vumbhoni bya bona eka misava . . . Ambi kuri vunyingi bya bona na vumbhoni bya bona vinyi, va, hi ngati ya bona, va lemerile vumbhoni bya bona. Va hundzile eka tinxaka hinkwato ta makhombo na hinkwaswo ku tisa Evhangeli. Va xanisekile; va biwile; va xupuriwile. "Xana hi fanele kuva hi rhwariwa kuya ekaya

eTilweni, hi mubedo wa swiluva swa ku olova, loko van'wana va lwerile ku kuma sagwadi, na ku tluta ku hundza emalwandle ya ngati-ke?" Xana hi langutela ku endla yini? "Ndzi fanele ku lwa loko ndzi fanele ku fuma. Engetelela nhlohlotelwa mina, Hosi." Hakunene. Hi lava e . . .

⁸² A hi lavi dinominexini yintshwa. A hi lavi muako wuntshwa wa kereke. Leswi hi swi lavaka namuntlha i machokolobyani ya xikhale, tilo ra wasi, mpfuxelelo wa Xipentekosta lowu dlayaka xidyoho, lowu nga tswarihi hi Pentekosta nakona wu vuyerile ekerekenei nakambe, matimba ya Moya lowo Kwetsima nakambe, ku tisa Yesu eka mbono.

⁸³ Xikwembu xa matimu minkarhi hinkwayo xi pfukela eka mbono hi nkarhi wa nkoka. Ha swi dinga. Sweswo hi leswi swi nga xiphigo hi kereke ya hina namuntlha. Hi le ku yeni ekule le ndzhaku. Hi le ku weleni endzeni ka tifexeni ta misava. Nakona hi kantsongo, lembe hi lembe, yi sungula ku fa swintsongo na ku vuna.

⁸⁴ I nkarhi wa ku tshena ku ngari khale. Xikwembu xi ta tlhela xi yi tsema hakunene tani hilaha ndzi yimeke eka phuluphiti ley. Xikwembu xi ta tlhela xi yi tsema ku endla leswaku yi tswala mihandzu. Xi ta tsema mintirho ya swa misava yi suka eka yona eka rin'wana ra masiku lawa. Tingana to tani, hi ndlela ley kereke yi ngaya emahlweni hakona ehansi ka vito ra vukhongeri.

⁸⁵ Kutani hi kuma leswaku, loko Yesu a suka, rifu ra nghena. Loko Yesu a sukela kereke ya hina, matimba ya Moya lowo Kwetsima ya sukela kereke ya hina, yi sungula ku tsana kutani—kutani yi fa. Nakona endzhaku ka nkarhi kuva ku nga hari na nchumu eka yona. Sweswi, loko Yesu a sukile, rifu ra nghena. Oho, a kuri nkarhi wo vava njhani.

⁸⁶ Kutani xiyisisani, va rhendzelekile hinkwako, kutani va rhumela eka Yesu, kambe A nga tanga. Va N'wi rhumerile nakambe, nakona A nga tanga, kambe A swi tiva leswi A ya eku swi endleni. Wa swi tiva vusiku lebyi, leswi A nga ta swi endla. A swi lahlekanga eka Yena: U swi tiva kahle leswi A lavaka ku swi endla. U ya eku pfuxeni ka vanhu, ntsena kuva na ntayiso tani hilaha ndzi yimeke eka phuluphiti ley. U ta pfuxa vanhu hikokwalaho ka Vito ra Yena ku suka eka rixaka ra Vamatiko. U ta swi endla.

⁸⁷ I nkarhi wa Mayuda lowu nga ekusuhi sweswi, nakona wa Vamatiko wu le ku heleni sweswi, hikuva va humile. Va le ku aleni ka Kreste; va le ku aleni ka masingita ya vona; va le ku aleni ka hinkwaswo leswi vuriwaka swa vukwembu, kutani va swi fungha tani hi muxaka wun'wana wa vuhalayi bya miehleketo kumbe matimba ya javulosi na ku endla . . . Va sandza Moya lowo Kwetsima na ku tilemela ekule na Xikwembu. Kutani Xikwembu xi ta teka nhlayso leyintsingo, endzhaku ka nkarhi,

kutani xi yi kurisa kuya eka Kereke ya matimba, kutani xi hundzuluxela Moya eka Mayuda, ivi xi yisa Kereke ya Vamatiko ekaya. Hakunene swi lulamile. Yi le ku lulamisiweni sweswi. Oho, hilaha, hi nga enkarhini wa makumu, kusuhi.

⁸⁸ Yesu, A swi tiva. Kutani endzhaku ka nkarhi U te, “Munghana wa hina Lazaro, u etlele.”

⁸⁹ Hikokwalaho ka yini, vadyondzisiwa a va ehleketa leswaku a lo wisa nyana. Aku, “Kumene, loko a etlele, u ta hanya.”

⁹⁰ Kunene, U virule hi ya Yena... marito ya vona, leswaku va ta n’wi twisisa, a ku, “U file, kutani Ndzi tsakile hikwalaho ka n’wina leswi ngi a Ndzi ngari kona.” Wa vona? “Hikwalaho ka n’wina, Ndzi tsakile leswi ngi a Ndzi ngari kona.” Hikuva a va tava vari karhi va N’wi kombela ku—ku horisa—ku n’wi horisa, kambe A swi tiva leswaku A ngata swi endla, hikuva xivono a xi nga se... endzhaku ka masiku lawaya ya mune A swi tiva leswaku a wu ri nkarhi lowu Tatana a N’wi byerile wona. Ku saseka ka swona; U swi virule esirheni, “Tatana, Ndza Ku khensa, U ndzi yingisile, kambe Ndzi vurisa sweswo hikwalaho ka ntshungu lowu wu ndzi rhendzeleke.” Wa vona? A swi tiva leswi A ya eku swi endleni. U te, “Ndzi taya ndzi ya n’wi pfuxa.”

⁹¹ Sweswi, ndza swi anakanya leswaku xindyangwana lexiya a xi tshovekile. Mutundzi a famble, ku vaviseka. Oho, swi sasekile loko u ri na kaya ro vaviseka kumbe mbilu yo vaviseka, kutani Yesu a humeleta xikan’we-kan’we, a hi swona? Ndza swi anakanya ku vona Marta, wansati lontsongo wo saseka a ri na xifunengeto xa ntima exikandzeni xa yena, na Mariya lontsongo, na vona a va khomanile, va ri karhi va ku, “Xana hi ta endla yini? Papa na Mhani va famble, na makwerhu wa hina wo hlawuleka... Sweswi, hi tshikile kereke, nakona hi tsemiwile ku suka eka vona, kutani hi humile hi landzela Yesu wa Nazareta. Nakona U famble a hi siya, empfhukeni.”

⁹² Ndzi twa musandzi a tshinela kutani a ku, “Heyi, xana u kwihi Muhorisi luya wa Matimba, Muprofeta luya wa le Galeliya? Xana U kwihi sweswi? Wa vona, loko hakunene ku fika nkarhi wova A endla swin’wana, U famble.” Hi sweswo. Wa vona, Xikwembu xa swi rhandza ku endla sweswo, ntsena ku pfumelela vanhu, ntsena, ku pfumelela vanhu va kombisa leswi va nga swona, ina, ntsena ku va ringeta ku vona leswi va nga xiswona hi xiviri. Xi va nyika nkateko. Xa humeleta, Xi tikombisa, Xi titivisa eka vanhu, ntsena ku vona leswaku va tava na maendlelo ya muxaka muni, ntsena ku vona leswaku va ta endla yini hi mayelana na swona.

⁹³ Sweswi, hi kuma leswaku, endzhaku ka—ka masiku nyana, mune wa masiku, mbuyangwani Lazaro a file. Va n’wi lahlile. Siku ra vumbirhi, siku ra yunharhu, siku ra yumune... Sweswi, mani na mani wa swi tiva leswaku ku bola ka sungula endzhaku ka masiku manharhu: nhompfu yi wela endzeni exikandzeni,

ku sungula. Kutani ku bola ku nghena; swivungu swa nhlonghe swi sungula ku dya miri. Va n'wi vekile ehansi, va tlhandleka ribye lerikulu ehenhla ka sirha leri va n'wi vekeke kona. Kutani kan'we endzhaku ka nkarhi, vanhwanyana lavantsongo a va ta huma va ya khinsama esirheni va rila.

⁹⁴ Endzhaku ka nkarhi, mahungu ya rhendzelekile, “Yesu u tile. Hi N'wi vonile a ri karhi a nghena edorobeni.” Oho, Marta lontsongo, loyi a ngava swonghasi, a tikomba, a hlwela hi mayelana na swona, u swi khorwisile hi nkarhi walowo leswi a ri xiswona. Hi loyi a taka. U ta a ri endleleni ya yena, a tsutsuma a ri karhi a lavalava. Ndzi twa van'wana va vona epatwini va ku, “Kunene, ndza tshembha leswaku u enerile sweswi, leswaku vukhongeri bya wena a byi ri vunwa.” U lo va honisa kutani a ya emahlweni, a hundza hi le xikarhi ka vasandzi hinkwavo. U rhelerile ku kondza a N'wi vona, kumbexani a tshamile ehansi ekhoneni ya xitarata.

⁹⁵ Sweswi, swi tikomba, a fanele... a tava a ri na mfanelo yo N'wi holovela na—na ku vulavula swo biha eka Yena. Hikokwalaho ka yini, a nga tsutsumanga a fika a ku, “Vona laha, vona laha, Wena. A wu fanele kuva Muprofeta, Wanuna wa Xikwembu. Hikokwalaho ka yini U nga tanga loko hi ku vitanile? Hikokwalaho ka yini, hi swihlekisi swa doroba sweswi. Hi humile ekerekeni ya hina kuva hi ta landzela Wena.” A swi tikomba ingaku a ri na mfanelo. Kambe ma swi tiva, tani hilaha ndzi nga chumayela eka, *Xinyimpfana Na Tuva*, loko hi ri xinyimpfana, xinyimpfana xi lahla mfanelo yin'wana na yin'wana leyi xi nga na yona. Hakunene swi lulamile. A xi na nchumu handle ka wulu, swingaleswi xi fanele ku swi lahla sweswo. Kutani u lahla mfanelo yin'wana na yin'wana leyi u nga na yona kuva u tirhela Xikwembu. Sweswo hakunene hi swona ngopfu.

⁹⁶ A ndzi ri karhi ndzi sala vavasati hi le ndzhaku hi mayelana na ndlela leyi a va ambala swiambalo leswintsongo swa khale, ma swi tiva, kutani va ku, “Kunene, hi—hi Maamerika. Hi nga endla leswi hi swi lavaka.”

⁹⁷ Ndzi ku, “Hakunene sweswo hi swona, kambe loko u ri xinyimpfana, u ta lahla timfanelo ta wena.” Ku dzaha tisigarete na ku tikhoma hi ndlela yaleyo, walowo i nchumu wo biha ku tlurisa lowu wansati a nga tshama a wu endla. Hakunene sweswo hi swona.

⁹⁸ Manana un'wana u ndzi byerile, ku ngari khale ngopfu, a ri karhi a vulavula na mina, a ku, “Kambe, Makwerhu Branham, a va ha endli muxaka wun'wana wa swiambalo.”

⁹⁹ Ndzi ku, “Kambe va ha yi endla michini yo rhunga na ku xavisa tinhundzu. Ku hava xo tibasisa eka swona na swintsongo.” Hakunene sweswo hi swona.

¹⁰⁰ Tsundzukani, siku rin'wana, u ngava u tengile lahawani eka nuna wa wena, kambe u ta tihlamulela eka vuoswi hikokwalaho ka swona, ntsena hakunene: "Mani na mani loyi a langutaka wansati ku n'wi navela, u n'wi oswile embilwini ya yena."

¹⁰¹ Xana i yini xiphijo xa vavasati va Pentekosta namuntlha, hi leswi ndzi tivutisaka swona. Hilaha mi ngaya ekule na ndzelakano wa khale. Hilaha vamanana va n'wina a va fuwa misisi yo leha hakona, kutani namuntlha vavasati va Pentekosta va tipenda ku kotisa ntawa wa Mardi Gras, na ku tsemeta misisi ya bona, na ku ambala swiambalo leswintsongo swo koma swa khale ku kotisa sweswo, ntsena tani hi ndlela hinkwayo...ku huma mi ya kutla jarata ni ndzhengha, loko vavanuna va ri karhi va hundza, xana ma swi lemuka, vavasati, leswaku mi ya eku tihlamuleleni hikokwalaho ko endla vuoswi na vavanuna? Mi tikombisa eka bona hikokwalaho ka xikongomelo xexo. I moya wo biha eka kereke na le ka vanhu, nakona a va swi tivi. I mabofu nakona a va switivi. I ntiyiso.

¹⁰² Kumbexani mi nga ha vula leswaku a ndzi na mfanelo yo vula sweswo tani hi muevhangheli. Kunene, ndzi—ndzi fanele ku landzelela ku rhangela ka Moya lowo Kwetsima; hi sweswo ntsena leswi ndzi nga ta swi vula. N'wina... Loko ndzo hlangana na n'wina eku avanyiseni, kutani ndzi tava ndzi ngari na ngati ya n'wina emavokweni ya mina. Fambelani ekule na misava nyana yin'wana na yin'wana leyi yi langutekaka tani hi Sathana. Yanani ekule na yona. Sukani eka yona. A ndzi na mhaka leswaku i vatlangi vangani va ka thelevhixini... A wu tano, lahawani, tani hi mutlangi wa ka thelevhixini; u nhwana wa Xikwembu.

¹⁰³ Ndzi chumayerile ekerekenei ya mufundhisi siku rin'wana, hi mayelana na hlonga ra khale, hi nkarhi luwa a va xavisa mahlonga nkarhi luwa wa khale. Kutani a va tshamela kuya va ya ma xava eka okixini. Nakona vanhu a vari, a vari eku humesenka mihioti, va ri karhi va rila, hikuva makaya ya bona; a va nga ha ta pfuka va tlhelerile eka wona. Nakona a va fanele ku va ba hi nkharisa. Kutani a va va xava ku kotisa loko u xava movha, ntsena hikokwalaho ka swin'wana na swin'wana, minxavo, na ku xavisa vanhu.

¹⁰⁴ Kutani siku rin'wana, muxavi u tile, n'watinkota, eka lamakulu masu-... nsimu leyikulu, swa antswa. Kutani a ku, "Xana i mangani mahlonga lama u ma xavisaka?"

¹⁰⁵ A ku, "Kunene, ndzi na van'wana vo ncicanisa." A va ta ringeta ku kuma lavakulu. Va teka vamanana, vatatana... Loko kuri ku wansati loyi a nga n'wi teka a ri wansati wo tsana, a va teka vavanuna lavakulu va rihanyu ra kahle kutani va va pfanganyisa na...ku kotisa tihanci na swiharhi. A swi ngari kahle. Xikwembu xi endlile munhu. Munhu a endla mahlonga. A swi kahle xo sungula, na kan'we. Xikwembu a xi nga lavi

leswaku munhu na un'we a va hlonga. Ee, nkulukumba. Nakona ku hava . . . Langutisani leswi nga humelela.

¹⁰⁶ Kutani exikarhi ka sweswo hinkwaswo, nakulorhi loyi a ku, “Kunene, ndzi nga tsakela ku xava van'wana va vona . . .” A lemukile nakulorhi un'wana lontsongo lahaya. A va nga boheki ku n'wi ba hi nkharisa. Xilevhу xa yena a xi yimele ehenhla, a yimisele nhloko ehenhla, ntsena tani hi nakulorhi wa xiviri, a ri karhi a rhendzeleka. Kutani n'watinkota luya a ku, “Ndzi tsakela ku n'wi xava.”

¹⁰⁷ Yena a ku, “Kambe a nga xavisiwi.”

¹⁰⁸ A ku, “Kunene, hikokwalaho ka yini?” A ku, “Xana hi yena murhangeri?”

¹⁰⁹ Yena a ku, “Ee, i hlonga.”

¹¹⁰ “Kunene,” a ku, “hikokwalaho ka yini? Xana u n'wi phamela ku antswa ku tlula lavan'wana hinkwavo?”

¹¹¹ Yena a ku, “Ee. U dya kwale xitangeni na lavan'wana hinkwavo. Hi yena hlonga.”

¹¹² A ku, “Xana i yini lexi xi n'wi endlaka a hambana swonghasi na lavan'wana hinkwavo?”

¹¹³ Kutani n'winyi wa yena a ku, “Ndzi tivutisile sweswo nkarhi wo leha, kambe siku rin'wana ndzi swi kumile. Le matiko xikaya, tata wa yena i hosi ya tiko. Nakona hambi leswi a nga muluveri ekule na le kaya, wa ha swi tiva leswaku hi yena n'wana wa hosi nakona u tikhoma ku kotisa yena.” Loko sweswo . . . Loko muaka tiko wa Afrika a nga swi lemuka leswaku tata wa yena i hosi, kutani lahawani muluveri etikweni ra vambe a nga tama a ha swi tiva leswaku ku tsemakanya lwandle hi yena n'wana wa hosi, xana vavasati na vavanuna a va fanele ku tikhoma njhani loko mi ri majaha na vanhwana va Xikwembu? Tikhomeni ku kotisa swona. Hakunene. Tikhomeni; mi tibasisa na ku tikhoma ku kotisa majaha na vanhwana va Xikwembu. A swi hlamarisi, leswaku i xiymo xa njhani.

¹¹⁴ Hi hina lava. Oho, Marta lontsongo, u tile a ri karhi a tsutsuma. A languteka ingaku a ri na—na ndlela yova a fanele ku vula swin'wana eka Yena. “Hikokwalaho ka yini U nga tanga eka makwerhu wa mina? Vona leswi hi nga Ku endlela swona, nakona U hi poyirile.” Kunene, loko a lo vula sweswo, xitori a xi tava xi nga helanga hi ndlela leyi xi nga herisa xiswona. Ee, nkulukumba. Swi hi ndlela leyi u kongomaka nyiko ya Matimba ya Xikwembu. Loko Xikwembu xi rhumela nyiko, u fanele ku yi kongoma kahle. Loko u kale u langutela ku kuma swin'wana eka yona, u fanele ku yi kongoma kahle. Nakona Marta a swi tiva sweswo. U tava kumbexani a hlayile hi mayelana na wansati wa Xunem na n'wana wa yena. Kutani u . . . Loko kuri ku wansati luya wa Xunem a swi tiva leswaku Xikwembu a xi ri eka Eliya, xana a swi tava njhani loko a Xi ri eka Yesu hakona? Kunene.

¹¹⁵ Swingaleswi, u yile kona hi makongomele ya kahle. U tsutsumile kutani a ya wela emilengeni ya Yena. Ndza swi rhandza sweswo! A wela emilengeni ya Yena ivi a ku, “Hosi...” Xexo i xiyimela vito xa Yena lexi lulameke. Sweswo hi leswi A ri xiswona. A ri Hosi ya yena. “Hosi, loko ngi a Wu ri kona, ingi makwerhu a nga fanga.”

¹¹⁶ Oho, mina! Oho, ntsena ndzi anakanya hi ku vona mbilu ya Yena leyikulu loko A langutisa wansati luya wo saseka, mihloti yi ri karhi yi khuluka ku rhelela hi marhama ya yena. A ku, “Hosi, loko ingi a Wu ri kona, makwerhu a tava a nga fanga.” Vonani leswi a nga swi vula. “Kambe hambi kuri sweswi, Hosi, hambi loko a file, hambi loko swivungu swa nhlonghe swi ri karhi swi kasa emirini wa yena, hambi kuri sweswi, Hosi, swin’wana na swin’wana leswi U nga ta swi kombela eka Xikwembu, Xikwembu xi ta Ku nyika swona.”

¹¹⁷ Oho, hi xexo xihundla xa kona. Mi nga ha vula leswaku, “Ndzi kukutile swibedele hinkwaswo. Dokodela u vula leswaku ndzi ya ekufeni, kambe hambi kuri sweswi, Hosi...ndzi lamatiwile hi vuvabyi bya marhambu; a ndzi koti ku famba, kambe hambi kuri sweswi, Hosi...”

¹¹⁸ Xihlangi lexiya a xi ri na nhloko *ya* mati leyikulu vusiku bya tolo. Ku hava nchumu lowu a mi ta wu endla. A ya ta hangalaka kutani ya bulusa xinhlokwwani xa xona ivi xi fa, “Kambe hambi kuri sweswi, Hosi...” Wa hari Xikwembu lexi fanaka. Wa hari Hosi leyi fanaka. “Hambi kuri sweswi, Hosi...” Nakona U tshamile evokweni ra xinene ra Xikwembu xa Matimba hinkwawo, ku endla swikhongelo ehenhleni ka swilo leswi hi koxaka leswaku U hi endlerile swona.

¹¹⁹ Sweswi, ndzi titwa ndzi kateka. Hakunene swi tano. Mi ta ndzi vitana muvumbuluki wo kwetsima hambi swi ri tano, swingaleswi mi nga ha no sungula, kutani mi swi hetisekisa.

¹²⁰ Swingaleswi, ina, nkulukumba, “Hambi kuri sweswi, Hosi, swin’wana na swin’wana leswi U nga ta swi kombela eka Xikwembu, Xikwembu xi ta swi endla.”

¹²¹ “Kombelani swin’wana na swin’wana eka Tatana hi Vito ra Mina, Ndzi ta swi endla,” ku vula Yesu.

¹²² “Hambi kuri sweswi, Hosi, swin’wana na swin’wana leswi U swi kombelaka, Xikwembu xi ta Ku nyika swona.” Oho, sweswo swi tava swi hundzulukile embilwini ya Yena leyikulu.

¹²³ Yena a ku, “Makwenu u ta tlhela a hanya nakambe.”

¹²⁴ Wansati a ku, “Ina, Hosi. U ta hanya. A ri jaha ra kahle. U ta humeleta hi ku pfuxiwa ka mani na mani hi siku ra makumu.” Mayuda a ma pfumela eka ku pfuxiwa ka mani na mani. “U ta humeleta hi ku pfuxiwa ka mani na mani hi siku ra makumu.”

¹²⁵ N’wi langutiseni. U tivuyeterile Yena hi yexe. A ku, “Hi mina ku Pfuka na Vutomi.” Oho, mina. A ku nga se tshama kuva na

munhu loyi a nga tshama a vula sweswo. A ku nga ta pfuka ku vile na un'wana endzhaku ka sweswo, loyi a nga ta swi vula. Hi yena a ri Yexe loyi a nga ta swi vula. "Hi mina ku Pfuka na Vutomi," ku vula Hosi. "Loyi a pfumelaka eka Mina, hambi loko a file, u ta tlhela a hanya. Kutani un'wana na un'wana loyi a hanyaka a va a pfumela eka Mina a ngaka a nga fi. Wa swi pfumela leswi xana?"

¹²⁶ Wansati a ku, "Ina, Hosi." Oho, a swi tiva leswaku swin'wana a swi lunghekela ku humelela. Swi fanele kuva tano.

¹²⁷ Loko ripfumelo leri humaka embilwini yo tshembheka ri hlangana na Xikwembu, matino ya mavhilwa ya hlangana kun'we ku kotisa *sweswo*. Swin'wana swi fanele ku humelela. Ndzi tlhontlha vayingiseri lava vusiku lebyi, hi Vito ra Yesu Kreste, pfumelelani ripfumelo ra n'wina ri hlangana na Xikwembu ku kotisa sweswo, eka timinetse tintsongo hi tava na Pentekosta yin'wana. Va tava na mpfuxelelo wo karhi lowu nga ta humelela edorobeni leri, ku tava ku ngari na maphorisa yo ringanelia etikweni kuva ya va tshamisa ehansi. Hi swona sweswo. Ku tava na mpfuxelelo wa xiviri. "Hambi kuri sweswi, Hosi..."

¹²⁸ "Kunene, Hosi, hi jumiwile eka *leswi*; hi endlile *leswi*, na ku endla *sweswo*." A ndzi na mhaka leswaku mi endlile yini, "Hambi kuri sweswi, Hosi..." U yimerile kuva mi N'wi vitana. U... "Wa pfumela leswi?" Hakunene. Ina, nkulukumba. "Hambi kuri sweswi, swin'wana na swin'wana leswi u N'wi kombelaka Swona..."

¹²⁹ "Xana mi n'wi veke kwihi?" Sweswi, U rhelela esirheni. A ri munhu ku ringanelia loko a rila; A ri Xikwembu ku ringanelia loko a pfuxa mufi.

¹³⁰ Lahawani ku ngari khale ngopfu, wansati loyi a welaka eka ntlawo karhi wa vanhu... A ndzi kali ndzi swi endla ntolovelu ku swi endla hi mayelana na tidinominexini. Kambe wansati loyi... A va pfumeli leswaku Yesu a ri na Matimba. Va ri A ri muprofeta ntsena. Sweswi, A ri... Loko kuri ku A ri muprofeta ntsena, hinkwerhu hi le vudyohweni. A ngava a vile Xikwembu, ku ngari chumu ehansi ka Xikwembu, kumbe mukanganyisi lonkulu loyi misava yi nga se tshamaka yi n'wi vona. Hi swona sweswo. A tlula munhu. Wansati a ku, "A ngari na Matimba."

¹³¹ Kuna swo tala swa sweswo eka evhangeli leyi ya vanhu namunthla; yi ringetaka ku endla Yesu Kreste kuva muprofeta. Hikokwalaho ka yini, A ri Xikwembu xa vaprofeta. Hakunene A ri xona.

¹³² Wansati u te, "Ndzi ta ku khorwisela swona hi Bibele, 'A ri munhu ntsena.'"

¹³³ Ndzi ku, "Swi endlili."

¹³⁴ Kutani a ku, “Loko A tava a yile esirheni ra Lazaro, Bibele yi ri, ‘U ririle.’ A fanele kuva loyi a faka kumbe A tava a nga rilanga.”

¹³⁵ Ndzi ku, “Manana, xana i Matsalwa ya wena yalawa?” A ndzi lavi ku delela lahwani hi ku vula leswi, kambe ndzi ta mi byela leswi ndzi nga n’wi byela swona.

¹³⁶ U te, “Hi swona.”

¹³⁷ Ndzi ku, “Xitatimente xexo xi vevukile ku tlula murhu lowu nga endliwa hi ndzhuti wa huku leyi nga sikela ku fa.” Ndzi ku, “Kunene, u—u hava nchumu na wun’we wo yima ehenhla ka wona.”

¹³⁸ Yena a ku, “Hikokwalaho ka yini, U ririle. Sweswo a swi kombisa leswaku A ri loyi a faka.”

¹³⁹ Ndzi ku, “A ri ha vumbirhi loyi a faka na loyi a nga fiki. A ri Xikwembu enyameni.”

¹⁴⁰ Yena a ku, “Oho, a swi twali.”

¹⁴¹ Ndzi ku, “U yile esirheni a ri karhi a rila. Sweswo i ntiyiso hakunene, kambe loko A tava a tivuyeterile hi Yexe . . .” Bibele yi ri, “A ku ngari na swo tala swo swi vona eka Yena; a ngari na ku saseka kuva hi nga N’wi navela.” Kambe loko A tava a vuyeterile makatla endzaku ivi a ku, “Lazaro, huma,” kutani wanuna loyi a file mune wa masiku na ku bola esirheni, a humelela. Yaloye a ri loyi a tlulaka munhu. Ndzi kombeni munhu loyi a nga swi endlaka. Xana a kuri yini? Ku bola ku tivile N’winyi wa kona. Vutomi byi tivile Mutumbuluxi wa byona. Swin’wana a swi fanele ku humelela. U vulavurile nakona wanuna loyi a file na kuva esirheni kwalomu ka mune wa masiku, a tlhela a pfuka, kutani a yima hi milenge ya yena, a hanya. Haleluya! Xexo a xi ri Xikwembu eka N’wana wa Xona. Ina, nkulukumba. Xexo a xi ri Xikwembu xi titivisaka hi Xoxe ha Yena, N’wana. Xexo a xi ri Xikwembu xi vulavulaka, ku ngari munhu.

¹⁴² A ri munhu loko A halahala ensinyeni luwa siku leriya kuva a kuma swin’wana swo dya. Luya a ri munhu. Kambe loko A teka makhekhe ya ntlhanu na tihlampfi timbirhi kutani a phamela ntlhanu wa magidi, yaloye a tlula munhu. Xexo a xi ri Xikwembu xi va phamelaka lahaya. A tlula muprefeta, ku tlula munhu, A ri Xikwembu-Munhu. Hakunene.

¹⁴³ U ettele endzhaku ka byatsu lebyintsongo vusiku byebyo, kutani lwandle a ri ri karhi ri pfuma na ku tlulatlula ku kotisa xipfalo xa bodlela le handle eka lwandle lerikulu, loko khume ra magidi ya madimona ya ta hlambanya leswaku ya ta N’wi nwerisa eka vusiku byebyo. A ri munhu, a tsanile na ku karhala hi ku khongelela vavabyi, a ettele le ndzhaku; nakona xihuhuri a xi kalanga xi N’wi kavanyeta. A ri munhu loko A ettele, kambe loko A pfuka, a tlhandleka nenge wa Yena ehenhla ka ntambhu ya byatsu, a langutisa ehenhla, kutani a ku, “Rhula, u yima,”

kutani xihuhuri na magandlati swi N'wi yingisa, yaloye a tlula munhu. Xexo a xi ri Xikwembu endzeni ka munhu, xi ri karhi xi titivisa hi Xoxe. Hi swona sweswo.

¹⁴⁴ A ri munhu exihambanweni loko A ta rilela ku tsetseleriwa. Loko A ta huwelela a ku, "Ndzi twa torha," yaloye a ri munhu. Loko A fa, A ri munhu, kambe hi mixo wa Paseka loko A tshova swilemo swa rifu, tihelle, na sirha, na ku pfuka nakambe, A tlula munhu: A kuri Xikwembu lexi vonakarisiweke. A swi hlamarisi kuva muphati a te:

Hi ku hanya, U ndzi rhandzile; hi ku fa, U ndzi
ponisile;
Hi ku lahliwa, U tekerile swidyoho swa mina
ekule;
Hi ku pfuka, U lulamisile mahala hi laha ku
nga heriki:
Eka rin'wana ra masiku U le kuteni—Oho, siku
ro kwetsima!

¹⁴⁵ U te, "Hikuva Ndza hanya, na n'wina ma hanya. Ma pfumela leswi xana?" Wa hari yaluya wa tolo, namuntlha, na hilaha ku nga heriki. Xana ma swi pfumela leswi? Ndzi pfumela leswaku Moya lowo Kwetsima wu kona kwala sweswi. Xana ma swi pfumela leswi? Ndzi pfumela leswaku Wu ta hi tata hi Vukona bya Wona. Xana ma swi pfumela leswi? Ndzi pfumela leswaku Moya lowo Kwetsima wu lava ku chululela Vukona bya Wona ehandle, ku horisa vavabyi, ku endla leswaku vanhu hinkwavo lava va nga riki na Moya lowo Kwetsima va tatiwa. Ma swi pfumela leswi? Xana mi pfumela hi timbilu ta n'wina hinkwato? A hi yimeni hi milenge ya hina kutani hi N'wi dzunisa. Ndzi pfumela leswaku U ta wela ehenhla ka hina sweswi.

¹⁴⁶ O Hosi Xikwembu, Mutumbuluxi wa tilo na misava, Mutsari wa Vutomi lebyi nga Heriki, Munyiki wa nyiko yin'wana na yin'wana ya kahle, ha "Swi pfumela leswi," Hosi. Hi pfumela leswaku hi Wena loyi a nga lawahani enhleneletanwini. Hi pfumela leswaku hi Wena u katekisaka mimoya ya hina. Hi pfumela leswaku hi Wena u chelaka Moya wa Wena ehenhla ka hina. Hi pfumela leswaku Wa hari yaluya wa tolo, namuntlha, na hilaha ku nga heriki. Hi pfumela leswaku U hanya hi masiku na masiku na swona mavito ya hina ya tsariwile eBukwini ya Xinyimpfana ya Vutomi. Hinkwawo matilo na misava swi ta hundza, kambe hi ta hanya hilaha ku nga heriki, hikuva Wena u hanya hilaha ku nga heriki. Hosi, U hi tshembhisile swona. Hi swi pfumela hi timbilu ta hina hinkwato. Hinkwaswo leswi nga eka hina, ha swi pfumela, Hosi. Ndza N'wi rhandza, ndza N'wi rhandza.

¹⁴⁷ Xana ma N'wi pfumela? Ndzi pfumela leswaku walowo i Moya lowo Kwetsima. Kuna Swin'wana swi welaka ehenhla ka hina. Xana ma swi pfumela leswi? Ndzi pfumela leswaku Wu

lava ku horisa munhu un'wana na un'wana sweswi. Xana ma swi pfumela leswi? Yimiselani mavoko ya n'wina eka Wona. Yimani hi milenge ya n'wina. Xana ma swi pfumela leswi? Moya lowo Kwetsima wu kona. Leswi hi Swona! Petro u te, "Leswi hi Swona." Lowu hi Wona, Moya lowo Kwetsima.

¹⁴⁸ O Hosi, Mutumbuluxi wa matilo na misava, rhumela matimba ma Wena, na minkateko ya Wena, na vunene bya Wena ehenhla ka vanhu lava, kutani u katekisa timbilu ta vona, na ku va pfumelela ku vona leswaku N'wana wa munhu wa hanya hi masiku na masiku. Hi nyike swona, O Hosi. Hi va tisa eka Wena, hi Vito ra Yesu Kreste, N'wana wa Xikwembu.

¹⁴⁹ Mani na mani loyi a nga riki na Moya lowo Kwetsima, yimisani mavoko ya n'wina kutani mi dzunisa Xikwembu. Ndzi pfumela leswaku Wu ta wela ehenhla ka n'wina. Un'wana a tlhandleki mavoko ya yena ehenhla ka vona. Leyi hi yona awara. Hikokwalaho ka yini hi yimela nkarhi wun'wana? Lowu hi wona nkarhi. Lowu i nkarhi wa Pentekosta, ku vuyela eka Xikwembu. Lulamani na Xikwembu, Pentekosta! Endlani leswaku timbilu ta n'wina ti hakasiwa hi matimba ya Xikwembu lexi hanya. Pfumelelani Moya wa Xona wu ta wu ta famba wu nghena endzeni ka n'wina, wu xurhisa mimoya ya n'wina. Xi kona vusiku na vusiku, xi kona ku horisa vavabyi, ku pfula matihlo ya mabofu, hi ma kahle na matimba lamakulu Xi khorwisa kuva Xona xi ri lexi fanaka hi masiku. Haleluya!

¹⁵⁰ Xi dzuniseni. Yimisani mavoko ma n'wina. Rivalani laha mi nga kona; tivani ntsena leswaku mi le kusuhi na Xona, nakona vunene bya Xona, na ku kwetsima ka Xona, na matimba ma Xona, na tintswalo ta Xona swi khomelela hilaha ku nga heriki. Hi lexi fanaka hilaha ku nga heriki. A ku katekisiwi Vito ra Hosi. Haleluya! Oho, dzunisani Vito ra Yona ro Kwetsima.

¹⁵¹ Oho, hilaha swi nga saseka hakona, hilaha Xi nga nkulukumba hakona. Xana i vangani lava va lavaka ku nyikela vutomi bya vona eka Xikwembu sweswi, hi vuntshwa? Yimisani mavoko ya n'wina. Xana i vangani lava va lavaka ku nyikela vutomi bya vona eka Xikwembu? Hi sweswo. Yimisani mavoko ma n'wina. A hi voneni Pentekosta. A hi voneni vanhu va Xikwembu. Ndzi ta yimisa voko ra mina. "Hosi, hi mina loyi. Ndzi rhume." Teka Ntsumi yi ri na makala ya altari kutani u rhumela matimba ya Wena ehenhla ka hina, Hosi. Xikwembu, hi nyike swona hi ku hetiseka ka Moya wa Wena, O Tatana. Yingisa xikhongelo xa hina, O Hosi. Yingisa xikhongelo xa hina, tani hi vana lava va pfumelaka lava va yimaka. Ku dzuneka a kuve eka Vito ra Wena.

¹⁵² Oho, ku kotisa magandlati ya ku kwetsima lawa ya waka, oho, mathonsi ya mberha ya tintswalo. O, ku dzuneka a kuve eka Xikwembu. Ingaku mimoya ya hina yi nga yima. Xana ma swi pfumela leswi? Xana ma swi pfumela leswi? Lowu i Moya

lowo Kwetsima wu taka. Lowu i nsusumeto lowu nga vonakiki lowu wu hi yisaka eka Mfumo wa Xikwembu, minkateko ya Pentekosta. Tlhelelani ekaya. Mi languteriwile le kaya. Mi vanhu vo hlawuleka. Xikwembu xi lava leswaku mi tinyikela. Vavasati, tibasiseni. Vavanuna, tibasiseni. A hi tlheleleni endzhaku eka Xikwembu kutani hi tirhela Xikwembu hi timbilu to basa.

¹⁵³ A ku dzunisiwe Xikwembu, Moya lowo Kwetsima wu le handle enhlengeletanweni. Ntsena endlani leswi mi twaka mi rhangeriwa ku swi endla. Ntsena pfumelela Moya lowo Kwetsima wu ku fambisa. Ku hava lexi ndzi nga ta xi vula. Ndzo ka ndzi nga swi tivi swo swi vula sweswi. Moya lowo Kwetsima wu le ka muako hinkwawo sweswi. A ku katekisiwe Vito ra Hosi. Ku dzuneka a kuve ka Hosi. Oho, Haleluya! Haleluya! Ku dzuneka a kuve ka Hosi. A ku dzunisiwe Hosi. Ku saseka ka swona, ku kwetsima ka swona... Ku saseka ka swona, ku kwetsima ka swona ku dzunisa ka vakwetsimi va Xikwembu eswikandzeni swa n'wina, ehenhleni ka Vukona bya Moya lowo Kwetsima lahwani lowu nga eku famba-fambeni na ku hi kombeta ku kwetsima ka Wona ehandle ka ntshungu lowukulu hi moya wun'we, wu ri karhi wu dzunisa Vito ra Yena.

¹⁵⁴ Hundzuluka u tlhavulana hi voko na munhu un'wana, u ku, "A ku dzunisiwe Hosi, makwerhu. A ku dzunisiwe Hosi, sesi." A hi ngheneni endzeni kutani hi pfumelela Xikwembu xi hi hakasela. A ku dzunisiwe Hosi. Hi swona sweswo. Hinkwenu n'wina Mamethodist, na Mabaptist, na Mapresbyterian, Mapentekosta, na Seventh Day Adventist, na hambi mi ngava yini, qhavulanani hi mavoko eVukoneni bya Hosi Xikwembu. Hi sweswo. Oho, Haleluya! Haleluya! Haleluya! Oho, ndzi tsakile ngopfu kuva ndzi ri un'wana wa vona. Ndzi tsakile ngopfu. Oho, ku handzulela makhumbi, ku cukumetela thyaka ehandle. Ku kwetsima! Ntshuxeko eHosini, ku dzunisa Vito ra Yona ro kwetsima... A ku katekisiwe Vito ra Hosi. Oho, Haleluya! A ku dzunisiwe Xikwembu.

¹⁵⁵ Oho, ntsena ndza swi rhandza ku vona sweswo: vanhu va ri karhi va qhavulana hi mavoko na ku nyukisa swikandza swa vona. Matimba ma Xikwembu ma ri, "Hi sweswo. Hi sweswo, hi vana va Xikwembu. Hinkwerhu hi kereke yin'we leyikulu, munhu un'we lonkulu eka Kreste Yesu, Mutekiwa wa Yena, Loyi a kwetsimaka." Ku vuya ka Hosi ku le ku tshineleni ekusuhi. Vanhu va Yona va le ku hlengaletaneni kun'we na ku tirhandza... hirirhandzu na matimba ma Vukona bya Yona. Oho, Leswi swi kotisa Tilo. Oho, leswi swi kahle. Amen. Oho, ku kwetsima ka swona, ku saseka ka swona: ntsena ku dzunisa Hosi hi Moya na hi matimba. Nkarhi wo tano. (Sweswo a kuri ku yima; hi sungula.)

¹⁵⁶ Ntsena ku hava... Ndzi byerile vamakwerhu, "Vamakwerhu, ku hava ndhawu yo yima kona." Ku hava ndhawu lahwani laha... A hi kali hi sungula, swingaleswi a hi yimi.

Ntsena—ntsena ku saseka... Xana i vangani lava va titwaka kahle? Ntsena Vukona bya Hosi, oh, mina, swi sasekile, Vukona bya Hosi lahwani.

¹⁵⁷ Sweswi, Vukona bya Hosi byi kona kuva byi horisa vavabyi, byi hanyisa vanhu. Ntsena Yi pfumeleni. Xana ma Yi pfumela? Loko ho Yi pfumela, swilo hinkwaswo swa koteka. Ma swi pfumela sweswo? Xana ma pfumela leswaku byebyo i Vukona bya Hosi?

¹⁵⁸ Sweswi, loko ma ha... Ndzi nyikeni nkarhi nyana, nkarhi nyana sweswi, kutani mi yingisela nyana xinkadyana. Mi nge ndzi mi khorwisa leswaku i Moya lowo Kwetsima lahwani. Mi nge ndzi mi kombu leswaku Moya lowo Kwetsima, Wona walowu wu vulavulaka, Wona lowu endlaka nchumu, wa swi tiva sweswo. I vangani lava va nga lahwani sweswi, lava va nga ta laha va ri karhi va vabya? Mi nge hi vona mavoko ya n'wina. Lava a va ri na vuvabyi... Kuna vanhu...

¹⁵⁹ Kuna wanuna loyi a nga yima lahwani. Xana wa pfumela, tatana? Ku hava makhadi ya xikhongelo lawa ya nga humesiwa, kambe xana wa pfumela leswaku Xikwembu xi nga ku horisa? Xana wa pfumela leswaku Xi nga ndzi byela xiphiko xa wena? Xi le tsheveni ra wena. U ya eku endliweni ka vuhandzuri. Hi swona sweswo. Vito ra wena i Tatana Cartwright. Hi swona sweswo. Hi swona xana? Famba-fambisa voko ra wena. Swi lulamile. Famba ekaya u ya hola, a byi nga ha ta laveka. Wa swi pfumela?

¹⁶⁰ Wanuna luya a nga tlakula n'wana emavokweni ya yena, xana wa pfumela kuva mina ndzi ri nandza wa Xikwembu? Xana wa pfumela kuva lowu wu ri Moya lowo Kwetsima? A ndzi ku tivi, a hi swona? A ndzi se tshama ndzi ku vona evuton'wini bya mina; hi valuveri. Xana wa pfumela leswaku Moya lowo Kwetsima wu nga ndzi byela leswi nga hoxeka hi n'wana yaloye? U na swirhumbani. Hi swona sweswo. A hi swona xana? Hakunene. A wu humi kona lahwani. Ee. U na xiphiko xa le khwirini, lexi u xanisiwaka hi xona, wena n'winyi. Hi swona sweswo, a hi swona? U huma eKansas City. Swi lulamile. Tlhelela endzhaku, Yesu Kreste wa ku horisa. Haleluya! U pfumela. Xana wa swi pfumela hi mbilu ya wena hinkwayo?

¹⁶¹ Hi ley় Ntsumi ya Hosi, yi lenga-lenga ehenhla ka wansati lontsongo—lontsongo, mukhegula wa musa, loyi a tshameke lahwani, a xanisiwaka hi heniya. Xana wa pfumela leswaku Xikwembu xi ta ku horisa eka heniya yaleyo, sesi? Wena, u nga na xiluva xintsongo xo tshwuka exigqokweni xa wena, yimisa voko ra wena. Swi lulamile. Famba ekaya u ya hola. Amen. Oho, i Xikwembu; i Kreste N'wana wa Xikwembu. U pfukile ekufeni. U kona kwala.

¹⁶² Sweswi, tlhandlekani mavoko ma n'wina ehenhla ka un'wana kutani mi nyikela xikhongelo xa nguva, un'wana na un'wana wa n'wina, loko ndza ha kombela un'wana kuva a ta

lahawani. Tana laha, boti. Loko ma ha tlhandlekile mavoko ma n'wina ehenhla ka un'wana ku kombisa leswaku Xikwembu xa horisa na swonavu, ndzi na boti lahawani loyi a nga ta nyikela xikhongelo na yenavu. (Yana mahlweni. Swi lulamile.) Ku dzuneka a kuve ka Hosi Xikwembu.



XANA WA SWI PFUMELA LESWI? TSO60-0402
(Believest Thou This?)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Muqivela, Dzivamisoko 2, 1960, a Municipal Auditorium a Tulsa, Oklahoma, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org